

BN Kedah yakin menang
Utusan Online
03 April, 2013
Oleh SHAHNI FARHANA MAT SAHIR

ALOR SETAR 2 April - Barisan Nasional (BN) Kedah yakin untuk meraih kemenangan 28 kerusi Dewan Undangan Negeri (DUN) sekali gus membentuk kerajaan negeri dengan majoriti dua pertiga pada Pilihan Raya Umum Ke-13 (PRU-13).

Pengerusi BN Kedah, Datuk Ahmad Bashah Md. Hanipah berkata, setakat ini 22 kerusi DUN dianggap berada dalam kawasan putih dan BN perlu memenangi enam lagi kerusi yang berada di kawasan kelabu.

"Usaha diteruskan habis-habisan sehingga hari mengundi dan kita yakin dengan jentera sedia ada kita mampu memenangi kerusi tersebut, insya-Allah," katanya kepada pemberita pada program Penggerak PRU-13 Parlimen Kuala Kedah di sini hari ini.

Turut hadir Menteri di Jabatan Perdana Menteri, Datuk Seri Jamil Khir Baharom yang juga Ketua Penerangan UMNO Kedah.

Pada pilihan raya umum 2008, BN Kedah memenangi 14 daripada 36 kerusi DUN.

Menurut Ahmad Bashah, bagi kerusi Parlimen pula, BN Kedah menyasarkan 11 daripada 15 kerusi berkenaan bagi memenangi pilihan raya kali ini selain mampu menawan pengundi atas pagar.

"Mereka tidak sokong mana-mana tapi berpihak kepada BN kerana mahu masa depan yang lebih baik berbanding sekarang.

"Apa yang telah berlaku selama lima tahun di Kedah ini akan buat mereka untuk berfikir dan membuat keputusan terbaik," katanya.

Beliau berkata, petugas dan jentera juga diminta untuk meningkatkan kerja di daerah masing-masing untuk memastikan pengundi di kawasan tersebut memberi sokongan kepada BN.

Hakcipta Terpelihara © UTUSAN MELAYU (M) BERHAD

Source : http://www.utusan.com.my/utusan/Pilihan_Raya/20130403/px_08/BN-Kedah-yakin-menang